

四庫全書

集部

欽定四庫全書

石倉歷代詩選卷五十三

明 曹學佺 編

中唐七

司空曙

字文明  
廣平人

關山月

蒼茫明月上夜久光如積  
漠野冷胡霜關樓宿遙客  
隴頭秋露暗磧外流沙白  
惟有故鄉人沾裳此聞笛

送程秀才

悠悠多路岐相見又別離東風催節換  
燄燄春陽散楚草漸煙緜江雲亦蕪漫  
送子恨何窮故關如夢中遊人盡還北  
旅雁辭南國楓樹幾回青逐臣歸不得

迎神曲

吉日兮臨水沐青蘭兮白芷假山鬼兮  
請東皇託靈均兮邀帝裳吹參差兮正苦  
舞婆娑兮未已鸞旌圓蓋望欲來山雨霏  
霏江浪起神既降兮我獨知因成再拜為

陳辭

送神曲

神之去回風嫋嫋雲容與桂樽瑶席不復陳蒼山綠水  
暮愁人

長林令衛象錫絲結歌

主人瑠盤盤素絲寒女眷眷墨子悲乃言假使錫為之  
八珍重沓失顏色手援玉筋不敢持始狀芙蓉新出水  
仰坼重衣傾萬藥又如合歡交亂枝紅繭向暮花參差

吳蠶絡茸抽尚絕細縷纖毫省欲滅雪髮羞垂倭墮鬢  
繡囊畏並茱萸結我愛此絲妙絕世間無為君作歌陳  
座隅

擬百勞歌

朱絲細絃金點雜雙蒂芙蓉共開合誰家稚女著羅裳  
紅粉青眉嬌暮妝木難作牀牙作席雲母屏風光照壁  
玉顏年幾新上頭迴身斂笑多自羞紅綃月落不復見  
可惜當時誰拂面

殘鶯百轉歌同王員外耿拾遺吉中孚李端遊

慈恩各賦一物

殘鶯一何怨百轉相尋續始辨下將高稍分長復促綿  
蠻巧狀語機節終如曲野客賞應遲幽僧聞詎足禪齋  
深樹夏陰清零落空餘三兩聲金谷箏中傳不似山陽  
笛裏寫難成憶昨亂啼無遠近晴宮曉色偏相引送暖  
初隨柳色來辭芳暗逐花枝盡共愛奇香那可親年年  
出谷待芳春此時斷絕為君惜明日玄蟬催鬢新

晚秋西省寄上李韓二舍人

晝漏傳清唱天街禁旅秋雁親承露掌砧隔曝衣樓賜膳中人送餘香侍女收仍聞勞上直晚步鳳池頭

送永陽崔明府

古國羣舒地前當桐栢關連綿江上雨稠疊楚南山沙館行帆息楓州候吏還乘藍若有暇精舍在林間

送曹三同猗遊山寺

山踏青蕪盡涼秋古寺深何時得連策此夜更聞琴窮

水雲同穴過僧虎共林殷勤如念我遺爾掛冠心

送夔州班使君

魚國巴庸路麾幢漢守過曉檣爭市隘夜鼓祭神多雲  
白當山雨風清滿峽波夷陵舊人吏猶誦兩岐歌

秋夜憶興善院寄苗發

右軍多住寺此夜後池秋自與山僧伴那因洛客愁卷  
簾霜靄靄滿目水悠悠若有詩相贈期君憶惠休

病中寄鄭十六兄



倦枕欲徐行開簾秋月明手便筇杖冷頭喜葛巾輕綠  
草前侵水黃花半上城虛消此塵景不見十年兄

過慶寶寺

黃葉前朝寺無僧寒殿開池晴龜出曝松暮鶴飛回古  
井碑橫草陰廊畫雜苔禪宮亦銷歇塵世轉堪哀

送柳震歸蜀

白日雙流靜西看蜀國春桐花能乳鳥竹節競祠神塞  
步徒相望先鞭不可親知從江僕射登榻更何人

送流人

聞說南中事悲君重竄身山村楓子鬼江廟石郎神  
稚留荒宅圖書託故人青門好風景為爾一沾巾

同苗員外宿薦福常師房

浮生共多故聚宿喜君同人息時聞磬燈搖乍有風  
霜堦疑水際夜木似山中一願持如意長來事遠公

送夏侯審赴寧國

青圻連白浪曉日渡南津山疊陵陽樹舟多建業人  
煙

霞高占寺楓竹暗停神如接玄暉集江城猶見親

雲陽館與韓紳宿別

故人江海別幾度隔山川乍見翻疑夢相悲各問年孤  
燈寒照雨亂竹暗浮煙更有明朝恨離杯惜共傳

賦得的的帆向浦

別浦參差去隨波遠近還初移芳草裏正在夕陽間隱  
映回孤驛微明出亂山向空看不盡歸思滿江關

送吉校書東歸

少年芸閣吏罷直暫歸休獨與親知別行逢江海秋聽  
猿看楚岫隨雁到吳洲處處園林好何人待子猷

送王閏

相送臨寒水蒼然望故關江蕪連夢澤楚雪入商山話  
我他年舊看君此日還因將獨悲淚一灑別離間

送鄭況往淮南

西楚見南關蒼蒼落日間雲離大雷樹潮入秣陵山登  
戍因高望停橈放溜閒陳公有賢榻君去豈空還

題江陵臨沙驛樓

江天清更愁風柳入江樓雁惜楚山晚蟬知秦樹秋淒涼多獨醉零落半同游豈獲平生意蒼然蘭杜洲

送史澤之長沙

謝朓懷西府單車觸火雲野蕉依戍客廟竹映湘君夢渚巴山斷長沙楚客分一杯從別後風月不相聞

送盧堪

羈貧不易去此日始西東旅舍秋霖葉行人寒草風酒

醒餘恨在野餞暫遊同莫使禰生刺空留懷袖中

送鄂州張別駕襄陽覲省

蒼蒼峴亭路臘月漢陽春帶雪半山寺行沙隔水人王  
祥因就宦萊子不違親正恨殊鄉別千條楚柳新

送柳震入蜀

粉堞連青氣喧喧雜萬家夷人祠竹節蜀鳥乳桐花酒  
報新豐景琴迎舊狹斜多聞滯遊客不似在天涯

九日落東亭

風息斜陽盡游人曲落間採花因覆酒行藥轉看山柳  
散新霜下天晴早雁還傷秋非騎省玄髮漸成斑

冬夜耿拾遺王秀才就宿因傷故人

舊時聞笛淚此夜重沾衣方恨同人少何堪相見稀竹  
煙凝澗壑林雪似芳菲多謝勞車馬應憐獨掩扉

送郎使君赴郢州

使君持節去雲水滿前程楚寺多連竹江檣遠映城登  
樓向月望寒廟傍山行若動鄉思詠應貽謝步兵

送盧使君赴夔州

鏡管隨旌旆，高秋遠上巴。  
白波連霧雨，青壁斷蕪葭。  
凭几雙峰靜，登樓萬井斜。  
政成知變俗，當應畫輪車。

和王卿立秋即事

秋宜何處眺，試問白雲官。  
暗入蟬鳴樹，微侵蝶繞欄。  
向風涼稍動，近日暑猶殘。  
九陌浮埃減，千峰爽氣攢。  
換衣防竹暮，沉果訝泉寒。  
宮響傳花杵，天清出露盤。  
禽當側弁遊，鮪對憑欄。  
一奏招商曲，空令繼唱難。



過終南柳處士

雲起山蒼蒼，林居蘿薜荒。  
幽人老深境，素髮與青裳。  
雨滌莓苔綠，風搖松桂香。  
洞泉分溜淺，崑筍出叢長。  
敗屨空松砌，餘棋在石牀。  
書名一為別，還路已堪傷。

題玉真觀公主山池館

香殿留遺影，春朝玉戶開。  
羽衣重素几，珠網儼輕埃。  
石自蓬山得，泉經太液來。  
柳絲遮綠浪，花粉落青苔。  
鏡掩鸞空在，霞消鳳不迴。  
惟餘古桃樹，傳是上仙栽。

酬李端校書見贈

綠槐垂穗乳鳥飛，忽憶山中獨未歸。  
青鏡流年看髮變，白雲芳草與心違。  
乍逢酒客春遊慣，久別林僧夜坐稀。  
昨日聞君到城闕，莫將簪弁勝荷衣。

題曠上人院

閉門不出自焚香，擁褐看山歲月長。  
雨後綠苔生石井，秋來黃葉滿繩牀。  
身閒何處無真性，年老曾言隱故鄉。  
更說本師同學在，幾時攜手見衡陽。

長安曉望寄程補闕

迢遞山河擁帝京，參差宮殿接雲平。  
風吹曉漏經長樂，柳帶晴煙出禁城。  
天淨笙歌臨路發，日高車馬隔塵行。  
獨有淺才甘未達，多慙名在魯諸生。

南原望漢宮

荒原空有漢宮名，衰草茫茫雉堞平。  
連雁下時秋水在，行人過盡暮煙生。  
西陵歌吹何年絕，南陌登臨此日情。  
故事悠悠不可問，寒禽野水自縱橫。

題凌雲寺

春江古寺遶滄波石磴盤空鳥道過  
百丈金身開翠壁萬龕燈焰隔煙蘿  
雲生客到侵衣濕花落僧禪覆地多  
不與方袍同結社下歸塵世竟如何

酬張芬赦後見贈

紫鳳朝銜五色書陽春忽布網羅除  
已將心變寒灰後豈料光生腐草餘  
建水風煙催客泪杜陵花竹夢郊居  
勞君故有詩人贈欲報瓊瑤恨不如

登樓

今日山晴後殘蟬菊發時登樓見秋色何處最相思

晚思

蛩吟窓下月草濕堦前露晚景淒我衣秋風入庭樹

黃子陂

岸芳春色曉水影夕陽微寂寂深煙裏漁舟夜不歸

石井

苔色徧危石桐陰入寒井幽人獨汲時洗藥殘陽影

金陵懷古

輦路江楓暗宮垣野草春傷心庾開府老作北朝臣

登峴亭

峴山回首望秦關南向關山幾日還此際登臨惟有泪  
不知風景在何山

送盧徹之太原謁馬尚書

榆落鵬飛關塞秋黃雲盡角見并州翩翩羽騎雙旌後  
上客親隨郭細侯

峽口送友人

峽口花飛欲盡春  
天涯去住淚沾巾  
來時萬里同為客  
今日翻成送故人

江村即事

罷釣歸來不繫船  
江村月落正堪眠  
縱然一夜風吹去  
只在蘆花淺水邊

送鄭錫

漢陽雲樹深無極  
蜀國風煙思不堪  
莫怪別君偏有淚

十年曾事晉征南

發渝州却寄韋判官

紅燭津亭夜見君  
繁絃急管兩紛紛  
平明分手空江去  
惟有猿聲滿水雲

病中嫁女妓

萬事傷心在目前  
一身垂淚對花筵  
黃金用盡教歌舞  
留與他人樂少年

出塞曲



月沒遼城暗出師  
雙龍金角曉天悲  
黃塵滿目隨風散  
不認將軍燕尾旗

歲暮懷崔峒耿渚

臘月江天見春色  
白花青柳疑寒食  
洛陽舊社各東西  
楚國遊人不相識

過闔采病居

每逢佳節何曾坐  
惟有今年不得遊  
張邴卧來休送客  
菊花楓葉向誰秋

耿偉

河東人

發南康夜泊潁石中

倦客乘歸舟春溪香將暮羣林結暝色孤泊有佳趣  
夜山轉長江赤月吐深樹颯颯松上吹泛泛花間露  
險石俯潭渦跳湍礙沿沂豈惟垂堂戒兼以臨深懼  
稍出回雁峰明登斬蛟柱連雲向重山杳未見鐘路

贈張將軍

寥落軍城暮重門返照間  
鼓鞞經雨暗士馬過秋閒  
慣

守臨邊郡曾營近海山關西舊業在夜夜夢中還

遊童子寺

半偈留何處全身棄此中雨餘沙塔壞月滿雪山空  
聳刹臨回磴朱樓間碧櫺朝朝日將暮長對晉陽宮

題清羅翁雙泉

側弁向清漪門中夕照移異源生暗石疊響落秋池  
葉擁沙痕沒流回草蔓隨泠泠無限意不獨遠公知

酬李汶

落照長楊苑秋天渭水濱初飛萬木葉又長一年人貧  
病仍為客艱虞更問津多慙惠然意今日肯相親

贈嚴維

許詢清論重寂寞佳山陰野路接寒寺閒門當古林海  
田秋熟早湖水夜漁深世上窮通理誰人奈此心

宋中

日暮黃雲合年深白骨稀舊村喬木在秋草遠人歸廢  
井莓苔厚荒田路徑微惟餘近山色相對似依依

秋夜思歸

來時猶暑服今已路漫漫多雨逢初霽深秋生夜寒投  
人心似切為客事皆難何處無留滯誰能暫問看

送崔明府赴青城

清冬賓御出蜀道翠微間遠霧開羣壑初陽照近關霜  
潭浮紫菜雪棧繞青山當似遺民去柴桑政自閒

送王將軍出塞

漢家邊事重竇憲出臨戎絕漠秋山在陽關舊路通列

營依茂草吹角向高風更就燕然石行者奏虜功

雨中留別

東西無定客風雨未休時  
憫默此中別飄零何處期  
青山違舊隱白髮入新詩  
歲歲迷津路生涯漸可悲

送楊將軍

一身良將後萬里討烏孫  
落日邊陲靜秋風鼓角喧  
遠山當磧路茂草向營門  
生死酬恩寵功名豈敢論

送夏侯審遊蜀

暮峰和玉壘回望不通秦更問蜀城路但逢巴語人石  
林鶯轉曉板屋月明春若訪嚴夫子無嫌卜肆貧

送張侍御赴郴州別駕

佐郡人難料分襟日復斜一帆隨遠水百口過長沙明  
月江邊夜平陵夢裏家王孫對芳草愁思杳無涯

送苗贊赴陽翟丞

夕陽秋草上去馬弟兄看年少初辭闕時危遠効官山  
行獨晚雨旅宿二陵寒詩興生何處嵩陽羽客壇

常州留別

萬里南天外，求書禹穴間。  
往來成白首，旦暮見青山。  
夜浦涼雲過，秋塘好月閒。  
殷勤羨陽桂，別此幾時攀。

關山月

月明邊檄靜，戍客望鄉時。  
塞古柳衰易，關寒榆發遲。  
蒼蒼萬里道，戚戚十年悲。  
今夜青樓上，還應照所思。

贈海明上人

來自西天竺，持經奉紫微。  
年深梵語變，行苦俗流歸。  
月



上安禪久苔生出院稀梁間有馴鴿不去復何依

津亭有懷

津亭一望鄉淮海晚茫茫草沒栖洲鷺天連映浦檣往  
來通楚越旦暮易漁商惆悵緘書畢何人向洛陽

東郊別業

東臯占薄田耕種過餘年護藥栽山刺澆蔬引竹泉晚  
雷期稔歲重霧報晴天若問幽人意思齊沮溺賢

早朝

鐘鼓餘聲裏，千官向紫微。  
冒寒人語少，乘月燭來稀。  
清漏聞馳道，輕霞映瑣闥。  
猶看嘶馬處，未啓掖垣扉。

雪後宿王純池州草堂

宿居湖上宅，琴韻靜參差。  
夜雪入秋浦，孤城連貴池。  
流年看共老，銜酒發中悲。  
良會應難再，晨鐘自有期。

旅次漢故時

我行過漢時，寥落見孤城。  
邑里經多難，兒童識五兵。  
廣川桑遍綠，叢薄雉連鳴。  
惆悵蕭關道，終軍願請纓。

過三郊驛却寄楊評事時此子郭令公欲有表  
薦

冉冉青衫客悠悠白髮人亂山孤驛暮長路百花新終  
歲行他縣全家望此身更思君去就早晚問平津

巴陵逢洛陽鄰舍

因君知北事流浪已忘機久客多人識高年衆病歸連  
雲湖色遠度雪雁聲稀盡說家林事悽傷淚滿衣

贈田家翁

老人迎客處籬落稻畦間  
蠶屋朝寒閉田家晝雨閒  
門間新薶草蹊徑舊諳山  
自道誰相及邀予試往還

贈韋山人

失意成逋客經年獨掩扉  
無機狎鷗慣多病見人稀  
流水如行藥孤雲伴採薇  
空齋莫閒笑心事與時違

春日即事

鄰里朝光遍披衣夜醉醒  
庖厨非舊火林木發新青  
接果移天性疏泉逐地形  
清明來幾日戴勝已堪聽

秋夜會宿李永宅憶江南舊遊

偶宿俱南客相看喜盡歸湖山話不極歲月念空違  
子夜高梧冷秋光遠漏微那無此良會惜在謝家稀

登鸛雀樓

久客心常醉高樓日漸低黃河經海內華岳鎮關西  
去遠千帆小來遲獨鳥迷終年不得意祇覺負東溪

夜尋盧處士

月高雞犬靜門掩向寒塘夜竹深茅宇秋庭冷石牀  
住

山年已遠服藥壽偏長  
虛棄如吾者過君益自傷

邠州留別

終歲山川路生涯總幾何  
艱難為客慣貧賤受恩多  
暮角寒山色秋風遠水波  
無人見惆悵垂鞚入煙蘿

送胡校書秩滿歸河中

古樹汾陰道悠悠東去長  
位卑仍解印身老始還鄉  
河水平秋岸關門向夕陽  
音書須數附莫學嵇康

送郭正字

濟江篇已出書府俸猶貧積雪商山道全家楚塞人大堤逢落日廣漢望通津却別魚潭下驚鷗那可親

酬暢當

同遊漆沮後已是十年餘幾度曾相夢何時定得書月高城影盡霜重柳枝疎且對樽中酒千般想未如

游鍾山紫芝觀

繫舟仙宅下清磬落春風雨數芝田長雲開石路重古房青磴接深殿紫煙濃鶴駕何時去游人自不逢

晚宿裴員外寺院得逢字

仲言多麗藻晚水獨芙蓉  
梁苑仍秋過仁祠又夜逢  
回林通暗竹去雨帶寒鐘  
願向空門裏修持比畫龍

秋夜喜盧司直嚴少府訪宿

寂寂閉層城悠悠此夜情  
早涼過鬢髮秋思入柴荆  
嚴子多高趣盧公有盛名  
還如杜陵下暫拂蔣元卿

尋覺公因寄李二端司空十四曙

少年常味道無事日悠悠  
及至悟生死尋僧已白頭  
雲



迴廬瀑雨樹落給園秋為我謝宗許塵中難久留

送河中張胄曹往太原計會迴

北風長至遠四牡向幽并衰木新田路寒蕪故絳城欲  
聞邊上信須計朔南程料變當臨事遙知外國情

之江淮留別京中親友

長雲迷一雁漸遠向南聲已帶千霜鬢初為萬里行繁  
蟲滿夜草連雨暗秋城前路諸侯貴何人重客卿

代宋州將淮上乞歸

唇齒相依危亡故遠歸身輕百戰出家  
在數重關上將堅深壘殘兵鬪落暉  
常聞鐵劒利早晚借餘威

春日洪州即事

鍾陵春日好春水滿南塘竹宇分朱閣  
桐花間綠楊蹉跎看鬢色留滯惜年芳  
欲問羈愁發秦關道路長

送友貶嶺南

暮年從遠謫落日別交親湖上北飛雁  
天涯南去人夢成湘浦夜淚盡桂陽春  
歲月茫茫意何時雨露新

賦得沙上雁

衡陽多道里弱羽復哀音還塞知何日驚絃亂此心夜  
陰前侶遠秋冷後湖深獨立汀洲意寧知霜霰侵

題清源寺

即王右丞故宅

儒墨兼宗道雲泉隱舊廬孟城今寂寞小輞自紆餘內  
學銷多累西林易故居深房春竹老細雨夜鐘疎陳跡  
留金地遺文在石渠不知登座客誰學蔡邕書

春日即事

芳菲那變易年鬢自蹉跎室與千峰對門惟二仲過宦  
情知已少生事託人多草色微風長鶯聲細雨和幾時  
猶滯拙終日望恩波縱欲論相報無如漂母何

仙山行

深溪人不到杖策獨緣源花落尋無徑雞鳴覺近村數  
翁皆藉草對奕復傾樽耆畢初成局歸逢幾世孫雲迷  
入洞處水別出山門惆悵歸城郭樵柯迹尚存

奉和元承杪秋憶終南舊居

白玉郎仍少羊車上路平  
秋風搖遠夢舊業起高情  
亂樹通秦苑重原接杜城  
溪雲隨暮淡野水帶寒輕  
廣榭留峰翠閒門響葉聲  
近蘇應已燒多稼又新成  
解佩從休沐承家豈退耕  
恭侯有遺躅何事學淵明

晚夏即事臨南居

何須學從宦其奈本無機  
蕙草芳菲歇青山早晚歸  
廣庭餘落照高枕對閒扉  
樹色迎秋老蟬聲過雨稀  
艱難逢事異去就與時違  
遙憶衡門外蒼蒼三徑微

晚登虔州即事寄李侍御

章溪與貢水何事會波瀾  
萬里歸人少孤舟行路難  
春光浮曲浪暮色隔連灘  
花發從南早江流向北寬  
故交參盛府新角聳危冠  
楚劍期終割隋珠惜未彈  
酒醒愁轉極別遠淚初乾  
願保喬松質青青過大寒

發綿津驛

孤舟北去暮心傷  
細雨東風春草長  
杳杳短亭分水路  
隆隆遠鼓集漁商  
千叢野竹連湘浦  
一派寒江下吉陽

欲問長安今遠近初年塞雁有歸行

送友人遊江南

遠別悠悠白髮新江潭何處是通津  
潮聲偏懼初來客海味惟甘久住人  
漠漠煙光前浦晚青青草色定山春  
汀洲更有南迴雁亂起聯翩北向秦

贈別劉員外長卿

清如寒玉直如絲世故多虞事莫期  
建德津亭人別夜新安江水月明時  
為文易老皆知苦謫宦無名倍足悲

不學朱雲能折檻空羞獻納在丹墀

秋日

返照入閭巷憂來與誰語古道無人行秋風動禾黍

秋夜

高秋夜分後遠客雁來時寂寞重門掩無人問所思

路傍墓

石馬雙雙當古樹不知何代公侯墓墓前靡靡春草深  
惟有行人看碑路



代園中老人

傭賃難堪一老身  
皤皤力役在青春  
林園手種惟吾事  
桃李成陰歸別人

古意

雖言千騎上頭居  
一世生離恨有餘  
葉下綺窓銀燭冷  
含啼自草錦中書

涼州詞

國使翻翻隨旆隴  
西岐路足荒城  
毳裘牧馬胡雛小

日暮蕃歌三兩聲

嚴維

字文正  
越州人

九月十日即事

家貧惟種竹時幸故人看菊度重陽  
少林經閨月寒宿醒猶落帽華髮強扶冠  
美景良難得今朝更盡歡

送舍弟

踈懶吾成性才華爾自彊  
早稱眉最白何事綬仍黃  
時暑嗟行邁家貧念聚糧  
祇應宵夢裏詩興屬池塘

酬王侍御西陵渡見寄

前年萬里別昨日一封書郢曲西陵渡秦官使者車柳  
塘薰晝日花圃溢春渠倘不嫌雞黍先令掃敝廬

酬普選二上人相期見寄

本意宿東林因聽子賤琴遙知大小朗已斷去來心夜  
靜溪聲近庭寒月色深寧知塵外意定後更成吟

九日陪崔峒郎中北山燕

上客南臺至重陽此會文菊芳寒露洗杯翠夕陽曛務

簡人同醉溪間鳥自羣府中官最小惟有孟叅軍

一公新泉

山下新泉出泠泠此發源落池纔有響噴石未成痕獨  
映孤松色殊分衆鳥喧惟當清夜月觀此啓禪門

同王徵君湘中有懷

八月洞庭秋瀟湘水北流還家萬里夢為客五更愁不  
用看書帙偏宜上酒樓故人京洛滿何日復同游

荆溪館呈丘義興

失路荆溪上依仁忽暝投長橋今夜月陽羨古時州野  
燒明山郭寒更出縣樓主人能授館無事五湖遊

同韓員外宿雲門寺

小嶺路雖近仙郎此夕過潭空觀月近澗靜見雲多竹  
翠煙深色松聲雨點和萬緣俱不有對鏡自垂蘿

秋夜船行

扁舟時屬暝月上有餘輝海燕秋還去漁人夜不歸中  
流何寂寂孤棹也依依一點前村火誰家未掩扉

送李端

故關衰草遍離別正堪悲  
路出寒雲外人歸暮雪時少  
孤為客早多難識君遲掩泣空相向風塵何所期

送薛居士和州讀書

孤雲獨鶴共悠悠萬卷經書一葉舟  
楚地巢城民舍小煙村宰樹鷺塘秋  
蒿萊織女晨炊黍隅落耕僮夕放牛  
年少不應辭苦節諸生若遇可封侯

題茅山李尊師所居

天師百歲少如童不到山中更不逢洗藥每臨新瀑水  
步虛時遶最高峰籬根五月留殘雪座右千年蔭古松  
此去人寰知近遠回看隔路一重重

送崔峒使往睦州兼寄薛司

如今相府用英髦獨往南州肯苦勞冰礪近開漁浦出  
雪雲初卷定山高木奴花映桐廬縣青雀舟隨白露濤  
使者須應訪蘆吏府中惟有范功曹

九日登高

詩家九日憐芳菊  
遲客高亭瞰浙江  
漢浦浪花搖素壁  
西陵樹色入秋窓  
木奴向晚憐金實  
桑落新開瀉玉缸  
四子醉時多講德  
莫論黃霸屈為邦

丹陽送韋叅軍

丹陽郭裏送行舟  
一別心知兩地秋  
日晚江南望江北  
寒鴉飛盡水悠悠

宿天竺寺

方外至人名道林  
恒將水月淨身心  
居然對我說無我



寂歷山深將夜深

歲初喜皇甫侍御至

湖上新正逢故人  
情深應不笑家貧  
明朝別後門還掩  
修竹千竿老一身

石倉歷代詩選卷五十三

欽定四庫全書

石倉歷代詩選卷五十四

明 曹學佺 編

中唐八

顧况

字通翁  
姑蘇人

嚴公釣臺作

靈芝產遐方威鳳翔層霄子陵何皎潔託志肩夷巢漢  
后雖則貴長揖不知高糠粃諫議職遠謝夔龍朝掃門

金方四月八日  
卷五十四  
彼何人昇降太迢遙扣舟遂冥往山谷多清颺

擬古

龍劍昔藏影送雄留其雌人生阻歡會神物亦別離碧  
樹感秋落佳人無還期夜琴為君咽浮雲為君滋愛而  
傷不見星漢徒參差

從軍行

弭節結徒侶從征赴龍城單于近突圍烽燧屢夜驚長  
弓挽滿月劍華霜雪明遠道百草殞峭覺寒風生風寒

欲砭肌爭奈衣裘輕回首家不見候雁空中鳴笳奏還  
以哀肅肅趣嚴程寄語塞外胡擁騎休橫行

奉同郎中韋使君郡齋雨中宴集

好鳥依嘉樹飛雨洒高城況與數君子列坐分兩楹文  
雅一何麗林塘含餘清我公來歸朝遊子不待晴白雲  
帝鄉遠滄江楓葉鳴拜手欲無言零淚如酒傾寸心已  
摧折別離骨始驚安得凌風翰肅肅賓天京

棄婦詞

古人雖棄婦棄婦有歸處今日妾辭君辭君欲何去本  
家零落盡慟哭來時路憶昔未嫁君聞君甚周旋及與  
同結髮值君適幽燕孤魂託飛鳥兩眼如流泉流泉咽  
不燥萬里關山道及至見君歸君歸妾已老物情棄衰  
歇新寵方妍好拭淚出故房傷心劇秋草妾以憔悴捐  
羞將舊物還餘生欲有寄誰肯相留連空牀對虛牖不  
覺塵埃厚寒水落芙蓉秋風墮楊柳記得初嫁君小姑  
始扶牀今日君棄妾小姑如妾長回首語小姑莫嫁如

兄夫

弋陽溪中望仙人城

何草乏靈芝無山不孤絕我行雖云蹇偶勝聊換節上  
界浮中流光響洞明滅晚禽曝霜羽寒魚依石髮自有  
無還心隔波望松雪

謝王郎中見贈琴鶴

此琴等焦尾此鶴方胎生赴節何徘徊理感物自并獨  
立江海上一彈天地清朱絃動瑤華白羽飄玉京因想

美門輩渺然四體輕子喬翔鄧林王母遊層城忽如啟  
靈署鸞鳳相呼鳴何由玉女牀去食瑯玕英

公子行

輕薄兒面如玉紫陌春風纏馬足雙轡懸金縷鶻飛長  
衫刺雪生犀束綠槐夾道陰初成珊瑚幾節如流星紅  
肌拂拂酒光凝當街背拉金吾行朝遊瑟瑟鼓聲發暮  
遊瑟瑟鼓聲絕入門不肯自升堂美人扶踏金階月

幽居弄

苔衣生花露滴月入西林蕩東壁扣商占角兩三聲洞  
戶深窓一冥寂獨去滄洲無四鄰身嬰世網此何身關  
情命曲寄惆悵久別山南山裏人

行路難

君不見見擔雪塞井徒用力炊沙作飯豈堪食一生肝膽  
向人盡相識不如不相識冬青樹上掛凌霄歲晏花凋  
樹不凋凡物多自有根本種禾終不生荳苗行路難行  
路難何處是平道中心無事當富貴今日覺君顏色好



日晚歌

日官官兮下山望佳人兮不還  
花落兮屋上草生兮階  
間日日兮春風芳菲兮欲歇  
老不可兮更少君胡為兮  
輕別

瑶草春

瑶草春杳容與江南艷歌京西舞  
執心輕子都信節冠  
秋胡千金不足重時論自有夫蟬  
鬢蛾眉明井底燕裙  
趙袂縈轆轤李生間之淚如綆不  
忍回頭看此井月中

桂樹落一枝池上鵲鵲啼孤影露桃穠李自成蹊流水  
終天不向西翠帳綠窓寒寂寂錦茵羅薦自淒淒瑤草  
春丹井遠別後相思意深淺

悲歌

邊城路今人犁田昔人墓岸上沙昔時江水今人家今  
人昔人共長嘆四氣相催節迴換明月皎皎入華池白  
雲離離度青漢

短歌

新繫青絲百尺繩  
心在君家轆轤上  
我心皎潔君不知  
轆轤一轉一惆悵  
何處春風吹曉幕  
江南淶水通朱閣  
美人二八顏如花  
泣向春風畏花落  
臨春風聽春鳥別  
時多見時少  
愁人一夜不得眠  
瑤井玉繩相對曉

春草謠

春草不解行  
隨人上東城  
正月二月色  
綿綿千里萬里  
傷人情

劉禪奴彈琵琶歌

樂府只傳橫吹好琵琶寫出關山道羈鴻出塞繞黃雲  
邊馬仰天嘶白草明妃怨中漢使迴蔡琰悲處胡笳哀  
神鬼知妙欲收響陰風切切四面來李陵寄書別蘇武  
自有生人無此苦當時若值霍嫖姚滅盡烏孫奪公主

洛陽早春

何地避春愁終朝憶舊遊一家千里外百舌五更頭客  
路偏逢雨鄉山不入樓故園桃李月伊水向東流

閒居自述

榮辱不關身誰為踈與親  
有山堪結屋無地可容塵  
白髮祇添老黃花不笑貧  
一樽朝暮醉陶令果何人

南歸

老病力難任猶多鬢雪侵  
鱸魚消宦况鷗鳥識歸心  
急雨江帆重殘更驛樹深  
鄉關殊可望漸次入吳音

寄江南鶴林寺石冰上人

山川重復出心地闇相逢  
忽憶秋江月如聞古寺鐘  
湖平南北岸雲抱兩三峰  
定力調香象真言攝毒龍  
風中

何處鷓鴣石上幾年松為報煙霞道人間共不容

樂府

暖谷春光至宸遊近甸榮雲隨天仗轉風入御簾輕翠  
蓋浮佳氣朱樓倚太清朝臣冠劍退宮女管絃迎細草  
承雕輦繁花入幔城文房開聖藻武衛宿天營玉醴隨  
觴至銅壺逐漏行五星含土德萬姓徹中聲親祀先崇  
典躬推示勸耕國風新正樂農器近銷兵道德關河固  
刑章日月明野人同鳥獸率舞感昇平

送從兄奉使新羅

六氣銅渾轉三光玉律調  
河宮清奉費海岳晏來朝  
地接提封入天平賜貢饒  
揚威輕破虜柔服耻征遼  
曙色黃金闕寒聲白鷺潮  
樓船方習戰驄馬是嘉招  
帝女飛銜石鮫人賣淚綃  
管寧雖不偶徐稚尙相邀  
獨島懸空翠孤霞上沈寥  
蟾蜍同漢月蟬蛩異秦橋  
水豹橫吹浪花鷹迴拂霄  
晨裝凌渺漭夜泊記招搖  
幾路通玄嶠何山是沃焦  
颶風晴自起陰火暝潛燒  
鬢髮成新髻人參

長舊苗扶桑迎日近折柳帶津遙夢向愁中積魂當別  
處銷臨川思結網見彈欲求鴉共散羲和歷誰差甲子  
朝滄波仗忠信驛語辨謳謠疊鼓鯨鱗隱陰帆鷁首飄  
南溟垂大翼西海飲文鯨指景尋靈草排雲聽洞簫封  
侯萬里外未肯後班超

送大理張卿

春色依依傷解攜月卿今夜泊隋堤白沙洲上江蘿長  
綠樹村邊謝豹啼遷客本來無倚仗故人相去隔雲泥



越禽惟有南枝分目送歸鴻飛向西

宿湖邊山寺

羣峰過雨澗淙淙松下禪局白鶴雙香透經窓籠檜栢  
雲生梵宇濕旛幢蒲團僧定風過席葦岫漁歌月墮江  
誰悟此生同寂滅老來諸障力能降

湖南客中春望

鳴雁嘹嘹北向頻淥波何處是通津風塵海內憐霜鬢  
涕淚天涯老一身故里音書應望絕他鄉景物又更新

便拋印綬從歸隱  
吳渚香蓴漫吐春

洛陽陌

珂珮逐鳴騶  
王孫結伴遊  
金丸落飛鳥  
乘興醉青樓

寄淮上柳十三

葦蕭中關戶  
相映綠淮流  
莫訝春潮濶  
鷗邊可泊舟

登樓

高閣成長望  
江流雁叫哀  
淒涼故吳事  
麋鹿走荒臺

憶鄱陽舊遊

悠悠南國思夜向江南泊楚客斷腸時月明楓子落

歸山作

心事數莖白髮生涯一片青山空林有雪相待古道無人獨還

宮詞

玉樓天半起笙歌風送宮嬪笑語和月殿影開聞夜漏  
水晶簾捲近秋河

桃花曲

魏帝宮人舞鳳樓  
隋家天子泛龍舟  
君王夜醉春眠晏  
不覺桃花逐水流

宿昭應

武帝祈靈太乙壇  
新豐樹色遶千官  
邨知今夜長生殿  
獨閉空山月影寒

憶故園

惆悵多山人復稀  
杜鵑啼處淚沾衣  
故園此去千餘里  
春夢猶能夜夜歸

聽角思歸

故園黃葉滿青苔  
夢後城頭曉角哀  
此夜斷腸人不見  
起行殘月影徘徊

湖中

青草湖邊日色低  
黃茆嶂裏鷓鴣啼  
丈夫飄泊今如此  
一曲長歌楚水西

江村夜後

江村日暮尋遺老  
江水東流橫浩浩  
竹裏聞窓不見人

門前舊路生春草

江上故居

家在雙峯蘭若邊  
一聲秋磬發孤煙  
山連極浦鳥飛盡  
月上青林人未眠

題葉道士山房

水邊楊柳赤欄橋  
洞裏神仙碧玉簫  
近得麻姑書信否  
潯陽江上不通潮

山中

野人愛向山中宿  
況在葛洪丹井西  
庭前有箇長松樹  
夜半子規來上啼

王郎中席歌妓

柳拂青樓花滿衣  
能歌宛轉世應稀  
空中幾處聞清響  
欲遶行雲不遣飛

竹枝詞

帝子蒼梧不復歸  
洞庭葉下楚雲飛  
巴人夜唱竹枝後  
腸斷曉猿聲漸稀

貽朱放

野客歸時無四鄰  
黔婁別久案常貧  
漁樵舊路不堪入  
何處空山猶有人

山僧蘭若

絕頂茅菴老此生  
寒雲孤木伴經行  
世人那得知幽徑  
遙向青峰禮磬聲

戎昱

荆南人

長安秋夕



八月更漏長愁人起常早閉門寂無事滿院生秋草昨  
宵北窓夢夢入荆南道遠客歸去來在家貧亦好

從軍行

昔從李都尉雙韃照馬蹄擒生黑山北殺敵黃雲西太  
白沉虜地邊草復萋萋歸來邯鄲市百尺青樓梯感激  
然諾重平生胆力齊芳筵暮歌發艷粉輕鬟低半酣秋  
風起鐵騎門前嘶遠戍報烽火孤城嚴鼓鼙揮鞭望塵  
去少婦莫含啼

客堂秋夕

隔窓螢影滅復流  
北風微雨虛堂秋  
蟲聲竟夜引鄉淚  
蟋蟀何知人自愁  
四時不得一日樂  
以此方悲客遊惡  
寂寂江城無所聞  
梧桐葉上偏蕭索

羅江客舍

山縣秋雲閣茅亭  
暮雨寒自傷庭葉  
下誰問客衣單有  
興時添酒無聊嬾  
整冠近來鄉國夢  
夜夜到長安

聞笛

入夜思歸切笛聲清更哀愁人不願聽自到枕前來風  
起塞雲斷夜深關月開平明獨惆悵飛盡一庭梅

漢上題韋氏莊

結茅同楚客卜築漢江邊日落數歸鳥夜深聞扣舷水  
痕侵岼柳山翠借厨煙調笑提筐婦春來蠶幾眠

衡陽春日遊僧院

曾共劉諮議同時事道林與君相掩淚來客豈知心  
雪凌春積爐煙向暝深依然舊章子相送出花林

古意

女伴朝來說知君欲棄捐  
懶梳明鏡下羞到畫堂前有  
淚沾脂粉無情理管絃不知  
將巧笑更遣向誰憐

桂州臘夜

坐到三更盡歸仍萬里  
賒雪聲偏傍竹寒夢不離家曉  
角分殘漏孤燈落碎花  
二年隨驃騎辛苦向天涯

題招提寺

招提精舍好石壁向江開  
山影水中盡鳥聲天上來  
一

燈傳歲月深院長莓苔日暮雙林碧泠泠送客回

送王明府入道

何事陶彭澤明時不掛冠為耽泉石趣不憚薜蘿寒輕  
雪籠紗帽孤猿傍醺壇懸燈老松下金竈夜燒丹

送張秀才之長沙

君向長沙去長沙僕舊諳雖之桂嶺北終是洞庭南山  
靄生朝雨江烟作夕嵐松醪能醉客慎勿怨湘潭

涇州觀元戎出師

寒日征西將蕭蕭萬馬叢吹笳覆樓雪祝纛滿旗風遮  
虜黃雲斷燒羌白草空金饒沸天外玉帳靜霜中朔野  
長城閉河源舊路通衛青師自老魏絳賞何功槍壘依  
沙迥轅門壓塞雄燕然如可勒萬里願從公

早梅

一樹寒梅白玉條迥臨村路傍溪橋應緣近水花先發  
疑是經春雪未銷

移家別湖上亭

好是春風湖上亭  
柳條藤蔓繫離情  
黃鶯久住渾相識  
欲別頻啼四五聲

過商山

雨暗商山過客稀  
路傍孤店閉柴扉  
卸鞍良久茅簷下  
待得巴人樵採歸

早春雪中

陰雲萬里晝漫漫  
愁坐關心事幾般  
為報春風休下雪  
柳條初放不禁寒

湖南春日二首

自憐春日客長沙江上無人轉憶家  
光景却添鄉思苦  
簷前數片落梅花

三湘飄寓若流萍萬里湘鄉隔洞庭  
羈客春來心欲碎  
東風莫遣柳條青

宿湘江

九月湘江水漫流沙邊長覽月華秋  
金風浦上吹黃葉  
一夜紛紛滿客舟



霽雪

風卷寒雲暮雪晴  
江煙洗盡柳條輕  
簷前數片無人埽  
又得書窓一夜明

征人歸鄉

三月江城柳絮飛  
五年遊客送人歸  
故將別淚和鄉淚  
今日闌干濕汝衣


寄許鍊師

埽石焚香禮碧空  
露華偏濕藥珠宮  
如何說得天壇上

萬里無雲月正中

題雲公山房

雲公蘭若深山裏  
月明松殿微風起  
試問空門清淨心  
蓮花不着秋潭水



石倉歷代詩選卷五十四

欽定四庫全書

集部

石倉歷代詩選卷五十五至五十八

詳校官庶吉士臣范逢恩

侍讀臣孫球覆勘

總校官進士臣朱鈐

校對官編修臣潘曾起

謄錄監生臣狄景通

欽定四庫全書

石倉歷代詩選卷五十五

明 曹學佺 編

中唐九

李益

字君虞  
隴西人

送遼陽使還軍

征人歌且行  
北上遼陽城  
二月戎馬息  
悠悠邊草生  
青山出塞斷  
代地入雲平  
昔者匈奴戰  
多聞殺漢兵  
平生

報國憤日夜角弓鳴勉君萬里去勿使虜塵驚

賦得早燕送別

碧草縵如綫去來雙燕飛長門未有春先入班姬殿梁  
空繞復息簷寒窺欲遍今至隨紅萼昔還悲素扇一別  
無秋鴻差池詎相見

溪中月下寄楊子尉封亮

蘅若奪幽色銜思杳無踪宵長霜露多歲晏淮海風團  
團山中月三五離夕同露凝朱絃絕觴至蘭玉空清光

液流波盛明難再逢常恐河漢遠坐窺煙景窮小人諒  
處陰君子樹大功永願勵高翼慰我丹桂叢

春晚賦得餘花落

留春春竟去春去花如此蝶舞遶應稀鳥驚飛詎已衰  
紅辭故萼繁綠扶凋蘂自委不勝愁庭風那更起

聞亡友王七嘉禾寺得素琴

故人惜此去留琴明月前今來我訪舊淚洒白雲天詎  
欲匣孤響送君歸夜泉撫琴猶可絕況此故無絃何必

雍門奏然後使潺湲

觀回軍

行行上隴頭隴月暗悠悠萬里將軍沒回軍隴戍秋誰  
令嗚咽水重入故宮流

喜邢校書遠至對雨同賦遠晚飯阮迓五韻

雀噪空城陰木衰羈思遠已蔽青山望徒悲白雲晚別  
離千里風雨中同一飯閒說逢康臨觴方接阮旅宦  
竟何如勞飛思自迓



城西竹園送裴佖王達

歲蕤凌風竹寂寞離人觴愴懷非外至沈鬱自中腸  
遠行從此始別袂重淒霜

月下喜邢校書至自洛

天河夜未央漫漫復蒼蒼重君遠行至及此明月光  
華星映衰柳暗水入寒塘客心定何似餘歡方自長

華陰東泉同張處士詣藏律師兼簡縣內同官

因寄齋中書

蒼崖抱寒泉淪照涸金碧潛鱗孕明晦山靈閔幽蹟前  
峰何其詭萬變窮日夕松老風易悲山秋雲更白故人  
邑中吏五里仙霧隔美質簡瓊瑤英聲作金石煩君竟  
相問問我此何適我因贊時理書寄西飛翺哲匠熙百  
工日月被光澤大國本多士荆岑無遺壁高網彌八紘  
皇圖明四闢羣才既兼暢顧我在草澤貴無身外名賤  
有區中役忽忽百齡內殷殷千慮迫人生已如寄在寄  
復為客舊國不得歸風塵滿阡陌

答郭黃中孤雲首章見贈

孤雲生西北從風西南飄帝鄉日已遠蒼梧無還颺已  
矣玄鳳歎嚴霜集靈苔君其勉我懷歲暮孰不凋

合源溪期張計不至

霜露肅時序緬然方獨尋暗溪遲仙侶寒澗聞松禽寂  
歷茲夜永清明秋序深微深澹澄夕煙景含虛林素志  
久淪否幽懷方自今

送諸暨王主簿之任

別愁已萬緒離曲方三奏遠宦一辭鄉南天異風候秦  
城歲芳老越國春山秀落日望寒濤公門閉清晝何用  
慰相思裁書寄關右

夜發軍中

邊馬櫪上驚雄劍匣中鳴半夜軍書至匈奴寇六城中  
間分暗陣太乙起神兵出沒風雲合蒼黃豺虎爭今日  
邊庭戰緣賞不緣名

將赴朔方早發漢武

弭蓋出故關窮秋首邊路問我此何為平生重一顧風  
吹山下草繫馬河邊樹奉役良有期回瞻終未屢去鄉  
幸未遠戎衣忽已故豈惟幽朔寒念我機中素去矣勿  
復言勉酬知音遇

罷鏡

手中青銅鏡照我少年時衰颯一如此清光難再持欲  
令孤月掩從遣半心疑縱使遠人見猶勝自見悲

自朔方還與鄭式瞻崔稱鄭子周岑贊同會法

雲寺三門避暑

予本踈放士，竭來非外矯。誤落邊塵中，愛山見山少。始  
投清涼宇，門值煙岫表。參差互明滅，彩翠竟昏曉。泠泠  
遠風來，過此羣木杪。英英二三彥，襟曠去煩擾。游川出  
潛魚，息陰勸飛鳥。狗物不可窮，惟於此心了。

來從竇車騎行

東髮逢世屯，懷恩抱明義。讀書良有感，學劍慚非智。遂  
別魯諸生，來從竇車騎。追兵赴邊急，絡馬黃金轡。出入

燕南陲由來重意氣自經臯蘭戰又破樓煩地西北護  
三邊東南留一尉時過歎如雲參差自不意將軍失恩  
澤萬事從此異置酒高臺上薄暮秋風至長戟與我歸  
騎來同棄置自酌還自飲非名又非利歌出易水寒琴下  
雍門淚出逢平樂舊言在天階侍問我從軍苦自陳少  
年貴丈夫交四海徒論身自致漢將不封侯蘇卿勞遠  
使今我終此曲此曲誠不易貴人難識心何由知忌諱

蓮塘驛

五月渡淮水南行遠山陂江村遠難應竹裏聞綠絲楚  
女肌髮美蓮塘煙露滋菱花覆碧渚黃鳥雙飛時渺渺  
汴洄遠憑風託微詞斜光動流睇此意難自持嬌歌本  
輕艷客行多怨思女蘿蒙幽蔓擬上青桐枝

登天壇夜見海

朝遊碧峰三十六夜上天壇月邊宿仙人攜我搴玉英  
壇上夜半東方明仙鐘撞撞近海日海中離離三山出  
霞梯赤城遙可分霓旌絳節倚彤雲八鸞五鳳紛在御



王母欲上朝元君羣仙指此為我說幾見塵飛滄海竭  
竦身別我期丹宮空山處處遺清風九州下視杳未旦  
一半浮生皆夢中始知武皇求不死去逐瀛洲羨門子

效古促促曲

為河上  
思婦作

促促何促促黃河九回曲嫁與棹船郎空牀將影宿不  
道君心不如石郎令妾貌長如玉

古別離

雙劍欲別風淒然雌沉水底雄上天江回漢轉兩不見

雲交雨合知何年古來萬事皆如此何用臨歧苦涕漣  
登夏州城觀送行人賦得六州胡兒歌

六州胡兒六蕃語十歲騎羊逐沙鼠沙頭牧馬孤雁飛  
漢君遊騎貂錦衣雲中征戍三千里今日征行何歲歸  
無定河邊數株柳共送行人一杯酒胡兒起作和蕃歌  
齊唱嗚嗚盡垂手心知舊國西州遠西向胡天望鄉久  
回頭忽作異方聲一聲回盡征人首蕃音虜曲一難分  
似說邊情向塞雲故國關山無限路風沙滿眼堪斷魂

不見天邊青作塚古來愁殺漢昭君

輕薄兒

豪不必馳千騎雄不在垂雙鞬天生俊氣自相逐出與  
鷗鷯同飛翻朝行九衢不得意下鞭走馬城西原忽聞  
燕雁一聲去回鞍挾彈平陵園歸來青樓曲未卒美人  
玉色當金樽淮陰少年不相下酒酣半笑倚市門安知  
我有不平色白日欲落紅塵昏死生容易如反掌得意  
失意由片言少年但飲莫相問此中報讎亦報恩

野田行

日没出古城野田何茫茫寒狐嘯青塚鬼火燒白楊昔  
人未為泉下客行到此中曾斷腸

竹窓聞風寄苗發司空曙

微風驚夜坐臨牖思悠哉開門復動竹疑是故人來時  
滴枝上露稍沾堦下苔何當一入幌為拂綠琴埃

水亭夜坐賦得曉霧

月落寒霧起沈思浩通川宿禽囀木散山澤一蒼然漠

漠沙上路云洲外田猶當依遠樹斷續欲窮天

送韓將軍還邊

白馬羽林兒揚鞭薄暮時獨將輕騎出暗與伏兵期  
雨雪移軍遠旌旗上壠遲聖心戎寄重未許讓恩私

晚春卧病喜振上人見訪

卧牀如舊日窺戶易傷春靈壽扶衰力芭蕉對病身  
道心空寂寞時物自芳新旦夕誰相訪惟當揖上人

春行

侍臣朝謁罷戚里自相通落日青絲騎春風白角雄關  
寒塞榆落月白胡天空君逐嫖姚將麒麟有戰功

述懷寄衡州令狐相公

調元方翼聖軒蓋忽言東道以中樞密心將外理同白  
頭生遠浪丹葉下高楓江上蕭疎雨何人對謝公

喜入蘭陵望紫閣呈宣上人

薤草開三徑巢林喜一枝地寬留種竹泉淺欲開池紫  
閣當踈牖青松入壞籬從今安僻陋蕭相是吾師

入南山全師蘭若

木隕水歸壑寂然無念心  
南行有真子被褐息山陰  
石路瑤草散松門寒景深  
吾師亦何授自起定中吟

送同落第東遊

東門有行客落日滿前山  
聖代誰知者滄洲今獨還  
片雲歸海暮流水背城閒  
余亦依嵩潁松花深閉關

喜見外弟又言別

十年離亂後長大一相逢  
問姓驚初見稱名憶舊容  
別

來滄海事語罷暮天鐘明日巴陵道秋山又幾重

送襄陽李尚書

天寒發梅柳憶昔到襄州樹暖燃紅燭江清展碧油風  
烟臨峴首雲水接昭丘俗尚春秋學詞稱文選樓都門  
送旌節符竹領諸侯漢沔分戎寄黎元減聖憂時追山  
簡興本自習家流莫廢思康樂詩情滿沃洲

同崔邠登鸛雀樓

鸛雀樓西百尺墻汀洲雲樹共茫茫漢家簫鼓空流水



魏國山河半夕陽事去千年猶恨速愁來一日即為長  
風煙併是思歸望遠目飛春亦自傷

送賈校書東歸寄振上人

北風吹雁數聲悲况指前林是別時秋草不堪頻送遠  
白雲何處更相期山隨匹馬行看暮路入寒城獨去遲  
為問東州故人道江淹已擬惠休詩

鹽州過胡兒飲馬泉

垂楊著水草如煙舊是胡兒飲馬泉幾處吹笳明月夜

何人倚劒白雲天從來凍合關山路今日分流漢使前  
莫使行人照容鬢恐驚憔悴入新年

石樓山見月

紫塞連年戍黃砂磧路窮故人今夜宿見月石樓中

嘉禾寺見亡友題壁

今日憶君處憶君君豈知空餘暗塵字讀罷淚仍垂

贈內兄盧綸

世故中年別餘生此會同却將悲與病來對朗陵翁

觀騎射

邊頭射鵬將走馬出中軍遠見平原上翻身向暮雲

幽州賦詩見意時佐劉幕

征戍在桑乾年年薊水寒殷勤驛西路北去向長安

軍次陽城烽舍

何地可潜然陽城烽戍邊今朝望鄉客不飲北流泉

惜春傷同幕故人

畏老身全老逢春解惜春今年看花伴已少去年人

聽唱赤白桃李花

赤白桃李花先皇在時曲欲向西宮唱西宮官樹綠

送客還幽州

惆悵秦城送獨歸薊門雲樹遠依依秋風莫射南來雁  
從遣承春更北歸

漢宮詞

漢室長陵小市東珠簾繡戶對春風君王昨日移仙仗  
玉輦將迎入漢中

避暑女冠

霧袖煙裙雲母冠  
碧琉璃簾井冰寒  
焚香欲使三青鳥  
靜拂桐陰上玉壇

度破訥沙

破訥沙頭雁正飛  
鷓鴣泉上戰初歸  
平明日出東南地  
滿磧寒光生鐵衣

拂雲堆

漢將新從虜地來  
旌旗半上拂雲堆  
單于每近沙場獵

南望陰山哭始回

汴河曲

汴水東流無限春  
隋家宮闕已成塵  
行人莫上長堤望  
風起楊花愁殺人

夜上西城聽梁州曲

鴻雁新從北地來  
聞聲一半却飛回  
金河戍客腸應斷  
更在秋風百尺臺

暖川

胡風凍合鷓鴣泉牧馬千羣逐暖川塞外征行無盡日  
年年移帳雪中天

邊思

腰懸錦帶佩吳鉤走馬曾防玉塞秋莫似關西將家子  
祇將詩思入涼州

從軍北征

天山雪後海風寒橫笛偏吹行路難磧裏征人三十萬  
一時回向月明看

聰明角

繁霜一夜落庭蕪  
吹角當城漢月孤  
無限塞鴻飛不度  
秋風卷入小單于

宮怨

露濕晴花春殿香  
月明歌吹在昭陽  
似將海水添宮漏  
共滴長門一夜長

奉和武相公郊居寓目

黃扉晚下禁垣鐘  
歸坐南闌三萬重  
獨有月中高興盡



雪峰明處見寒松

觀石將軍舞

微月東南上戍樓琵琶起舞錦纏頭更聞橫笛關山遠  
白草胡沙西塞秋

楊州送客

南行直入鷓鴣羣萬歲橋邊一送君聞道望鄉聞不得  
梅花暗落嶺頭雲

統漢峰下

統漢峰西降戶營  
黃河戰國擁長城  
只今已勒燕然石  
此地無人空月明

隋宮燕

燕語如傷舊國春  
宮花一落旋成塵  
自從一閉風光後  
幾度飛來不見人

上汝州郡樓

黃昏鼓角似邊州  
三十年前上此樓  
今日山城對垂淚  
傷心不獨為悲秋

夜上受降城聞笳

回樂峰前沙似雪  
受降城上月如霜  
不知何處吹蘆管  
一夜征人盡望鄉

臨滹沱見蕃使列名

漠南春色到滹沱  
碧柳青青塞馬多  
萬里江山今不閉  
漢家頻許郅支和

寫情

水紋珍簟思悠悠  
千里佳期一夕休  
從此無心愛良夜

任他明月下西樓

春夜聞笛

寒山吹笛喚春歸  
遷客相看淚滿衣  
洞庭一夜無窮雁  
不待天明盡北飛

送人歸岳陽

煙草連天楓樹齊  
岳陽歸路子規啼  
春江萬里巴陵戍  
落日看沉碧水西

石倉歷代詩選卷五十五